

四庫全書

史部

欽定四庫全書

史部

史記集解卷一至五

詳校官侍讀學士

臣陸伯煊

洗馬

臣王坦修

覆勘

總校官檢討

臣何思鈞

校對官待詔

臣胡士震

謄錄監生

臣黃其榮

欽定四庫全書

史部一

史記集解

正史類

提要

臣等謹案史記集解一百三十卷宋裴駟撰
駟字龍駒河東聞喜人官至中郎外兵曹參
軍事迹附見宋書裴松之傳駟以徐廣音義
麤有發明殊恨省畧乃采九經諸史并漢書
音義及衆書之目別撰此書其所引證多先

儒舊說張守節正義嘗備述所引書目次然如國語多引虞翻注孟子多引劉熙注韓詩多引薛君注而守節未著於目知當日援据浩博守節不能遍數也原本八十卷隋唐志著錄並同此本為毛氏汲古閣所刊析為一百三十卷原第遂不可考然注文猶仍舊本自明代監本以索隱正義附入其後又妄加刪削訛舛遂多如五帝本紀音高陽氏有才

子八人句下高辛氏有才子八人句下均脫
名見左傳四字秦始皇本紀輕車重馬東就
食句下脫徐廣曰一無此重字八字項羽本
紀其九月會稽守句下脫徐廣曰爾時未言
太守九字武帝紀祠上帝明堂句下脫徐廣
曰常五年一修耳今適二年故但祀明堂十
八字然其效可覩矣句下脫又數本皆無可
字七字河渠書岸善崩句下脫如淳曰河水

岸六字司馬相如傳傍徨乎海外句下此引
郭璞云青邱山名上有田亦有國出九尾狐
在海外太史公自序易大傳句下此引張晏
曰謂易繫辭監本均誤作正義至於字句異
同前後互見如夏本紀九江入賜大龜句下
孔安國曰出於九江水中監本作山中孝文
本紀昌至渭橋句下引蘇林曰在長安北三
里監本多渭橋二字祁侯賀為將軍句下引

徐廣曰姓繒監本多一賀字當有玉英見句
下引瑞應圖云王英五帝並修則見監本作
五常案此似以監本為是屬國悍為將屯將
軍句下引徐廣曰姓徐監本多一賀字孝景
本紀封故御史大夫周苛孫平為繩侯句下
引徐廣曰一作應監本多一平字武帝紀自
太主句下引徐廣曰武帝姑也監本多太主
二字龜策列傳蝟辱於鵲句下引郭璞曰蝟

憎其意心惡之也監本作而心惡之凡此之類當由古注簡質後人以意為增益已失其舊至坊本流傳脫誤尤甚如夏本紀澧水所同句下引孔安國曰澧水所同同於渭也坊本缺一同字項羽本紀乃封項伯為射陽侯句下脫徐廣曰項伯名纏字伯九字是又出監本下矣惟貨殖傳麴鹽豉千瓠句下監本引孫叔敖云瓠器受斗六升合為瓠音貽

當是孫叔然之訛此本亦復相同是校讐亦不免有疎然終勝元豐合併之本也乾隆四十六年十一月恭校上

總纂官

臣

紀昀

臣

陸錫熊

臣

孫士毅

臣

費

總校官

臣

陸

臣

費

臣

墀

臣

費

史記集解序

班固有言曰司馬遷據左氏國語采世本戰國策述楚漢春秋接其後事訖於天漢其言秦漢詳矣至於采經摭傳分散數家之事甚多疏略或有抵牾亦其所涉獵者廣博貫穿經傳馳騁古今上下數千載間斯已勤矣又其是非頗謬於聖人論大道則先黃老而後六經序游俠則退處士而進姦雄述貨殖則崇勢利而羞貧賤此其所蔽也然自劉向揚雄博極羣書皆稱遷有良史

之才服其善序事理辯而不華質而不俚其文直其事核不虛美不隱惡故謂之實錄駟以為固之所言世稱其當雖時有紕繆實勒成一家總其大較信命世之宏才也考校此書文句不同有多有少莫辯其實而世之惑者定彼從此是非相賀真偽舛雜故中散大夫東莞徐廣研核衆本為作音義具列異同兼述訓解麓有所發明而殊恨省略聊以愚管增演徐氏采經傳百家并先儒之說豫是有益悉皆抄內刪其游辭取其要實或

義在可疑則數家兼列漢書音義稱臣瓚者莫知氏姓
今直云瓚曰又都無姓名者但云漢書音義時見微意
有所裨補譬疇星之繼朝陽飛塵之集華嶽以徐為本
號曰集解未詳則闕弗敢臆說人心不同聞見異辭班
氏所謂疏略抵牾者依違不悉辯也愧非胥臣之多聞
子產之博物妄言末學蕪穢舊史豈足以闢諸蓄德庶
賢無所用心而已

欽定四庫全書

史記集解卷一

宋 裴駰 撰

史記一

凡與徐氏義稱徐姓名以別之
徐者悲是駟注解并生家義

五帝本紀第一

黃帝者

徐廣曰
號有

少典之子姓公孫

燕周曰有熊國君少
典之子也皇甫謐曰

有熊今河南

名曰軒轅生而神靈弱而能言幼而徇齊

軒即足也

徐廣曰墨子曰年踰十五則聰明心慮無不徇
通矣駟案徇疾齊速也言聖德幼而疾速也

長而敦

欽定四庫全書

敏成而聰明軒轅之時神農氏世衰

皇甫謐曰易稱庖犧氏沒神農氏作

是為炎帝班固曰教民耕農故號曰神農

諸侯相侵伐暴虐百姓而神農弗

能征於是軒轅乃習用干戈以征不享諸侯咸來賓從

而蚩尤最為暴莫能伐

應劭曰蚩尤古天子璫曰孔子三朝記曰蚩尤庶人之貪者

炎帝欲侵陵諸侯諸侯咸歸軒轅軒轅乃修德振兵治

五氣

王肅曰五行之氣

藝五種

藝樹也詩云藝之荏菹周禮曰穀宜五種鄭玄曰五種黍稷菽

麥稻也

撫萬民度四方

王肅曰度四方而安撫之

教熊羆貔貅羆虎以

與炎帝戰於阪泉之野

服虔曰阪泉地名皇甫謐曰在上谷

三戰然後得

其志蚩尤作亂不用帝命於是黃帝乃徵師諸侯與蚩

尤戰於涿鹿之野

服虔曰涿鹿山名在涿郡張晏曰涿鹿在上谷

遂禽殺蚩尤

皇覽曰蚩尤冢在東平郡壽張縣闕鄉城中高七丈民常十月祀之有赤氣出如匹絳帛民名為蚩尤旗肩髀冢在山陽郡鉅野縣重聚大小與闕冢等傳言黃帝與蚩尤戰於涿鹿之野黃帝殺之身體異處故別葬之

而諸侯咸尊軒轅為天子代神農氏是為黃帝天下有

不順者黃帝從而征之平者去之披山通道

徐廣曰披他本亦作

陂字蓋當為設設者旁其邊之謂也披語誠合今世然古今不必同也

未嘗寧居東至于

海登丸山

徐廣曰丸一作凡駟案地理志曰丸山在郎邪朱虛縣

及岱宗西至于

空桐

應劭曰山名韋昭曰在隴右

登雞頭南至于江登熊湘

封禪書曰南伐

至于召陵登熊山地理志曰湘山在長沙益陽縣

北逐葷粥

匈奴傳曰唐虞以上有山戎獫狁葷

粥居于北蠻

合符釜山而邑于涿鹿之阿遷徙往來無常處

以師兵為營衛官名皆以雲命為雲師

應劭曰黃帝受命有雲瑞故以

雲紀事也春官為青雲夏官為緇雲秋官為白雲冬官為黑雲中官為黃雲張晏曰黃帝有景雲之應因以名

師與官

置左右大監監于萬國萬國和而鬼神山川封禪

與為多焉

徐廣曰多一作朋

獲寶鼎迎日推策

晉灼曰策數也迎數之也瓚曰

日月朔望未來而推之故曰迎日

舉風后力牧常先大鴻

鄭玄曰風后黃帝三公也

班固曰力牧黃帝相也
以大鴻見封禪書
以治民順天地之紀幽明之占死

生之說

徐廣曰一云幽明之數合死生之說

存亡之難時播百穀

王肅曰時是也

草木淳化鳥獸蟲蛾旁羅日月星辰水波

徐廣曰一作沃

土石

金玉勞勤心力耳目節用水火材物有土德之瑞故號

黃帝黃帝二十五子其得姓者十四人黃帝居軒轅之

丘

皇甫謐曰受國於有熊居軒轅之丘故因以為名又以為號山海經曰在窮山之際西射之南張晏曰作

軒冕之服故謂之軒轅

而娶於西陵之女是為嫫祖

徐廣曰祖一作俎嫫力追

反嫫祖為黃帝正妃生二子其後皆有天下其一曰玄

郇是為青陽青陽降居江水其二曰昌意降居若水昌
意娶蜀山氏女曰昌僕生高陽高陽有聖德焉黃帝崩
皇甫謚曰在位百年
而崩年百一十一歲葬橋山
皇覽曰黃帝冢
在上郡橋山
其孫昌意
之子高陽立是為帝顓頊也

帝顓頊高陽者

皇甫謚曰都帝丘
今東郡濮陽是也

黃帝之孫而昌意之

子也靜淵以有謀疏通而知事養材以任地載時以象

天依鬼神以制義治氣以教化潔誠以祭祀北至于幽

陵南至于交趾西至于流沙

地理志曰流沙
在張掖居延縣

東至于蟠

木海外經曰東海中有山焉名曰度索上有大桃樹屈蟠三千里動靜之物大小之神

日月所照莫不砥屬王肅曰砥平也四遠皆平而來服屬帝顓頊生子曰

窮蟬顓頊崩

皇甫謐曰在位七十八年九十八皇覽曰顓頊冢在東郡濮陽頓丘城門外廣陽

里中頓丘者城門名頓丘道而玄黿之孫高辛立是為帝嚳

帝嚳高辛者

張晏曰少昊之前天下之號象其德顓頊以來天下之號因其名高陽高辛皆所興

之地名顓頊與嚳皆以字為號上古質故黃帝之曾孫也高辛父曰蟠極蟠

極父曰玄黿玄黿父曰黃帝自玄黿與蟠極皆不得在

位至高辛即帝位

皇甫謐曰都亳今河南偃師是高辛於顓頊為族子

高辛生而神靈自言其名普施利物不於其身聰以知
遠明以察微順天之義知民之急仁而威惠而信脩身
而天下服取地之材而節用之撫教萬民而利誨之歷

日月而迎送之明鬼神而敬事之其色郁郁其德嶷嶷

其動也時其服也士帝嚳既執中而徧天下

徐廣曰古既字作水

旁徧字一作尹

日月所照風雨所至莫不從服帝嚳娶陳鋒氏

女生放勳娶姬訾氏女生摯帝嚳崩

皇甫謐曰在位七十年年百五歲皇

覽曰帝嚳冢在東郡濮陽頓丘城南臺陰野中

而摯代立帝摯立不善崩而弟

放勛立是為帝堯帝堯者

謚法曰翼善傳聖曰堯

放勛

徐廣曰號陶唐皇甫

謚曰堯以甲申歲生甲辰即帝位甲午徵舜甲寅舜代行天子事辛巳崩年百一十八在位九十八年其

仁如天其知如神就之如日望之如雲富而不驕貴而

不舒黃收純衣

徐廣曰純一作綬駟案太古冠冕圖云夏名冕曰收禮記曰野夫黃冠鄭玄曰

純衣士之祭服

彤車乘白馬能明馴德

徐廣曰馴古訓字

以親九族九

族既睦便章百姓

徐廣曰下云便程東作然則訓平為便也駟案尚書並作平字孔安國曰

百姓百官鄭玄曰百姓羣臣之父子兄弟

百姓昭明合和萬國乃命羲和安

國曰重黎之後義氏和氏世掌天地之官

敬順昊天數法日月星辰敬授民

時分命義仲居郁夷曰暘谷

尚書作暘夷孔安國曰東表之地稱暘夷日出於暘

谷義仲治東方之官

敬道日出便程東作

孔安國曰敬道出日平均次序東作之事以務

農也

日中星鳥以殷中春

孔安國曰日中謂春分之日也鳥南方朱鳥七宿也殷正也春

分之昏鳥星畢見以正仲春之氣節轉以推孟季則可知也

其民析鳥獸字微

孔安國曰

春事既起丁壯就功言其民老壯分析也乳化曰字尚書微作尾字說文云尾交接也

申命義叔

居南交

孔安國曰夏與春交此治南方之官也

便程南譌敬致

孔安國曰譌化也平

序分南方化育之事敬行其教以致其功也

日永星火以正中夏

孔安國曰永長也謂

夏至之日火蒼龍之中星舉中則七星見可知也以正中夏之節馬融王肅謂日長晝漏六十刻鄭玄曰五十

五其民因鳥獸希革

孔安國曰因謂老弱因就在田之
丁壯以助農也夏時鳥獸毛羽希

少改易也

革政也 申命和仲居西土

徐廣曰一無土字以為西
者今天水之西縣也駟案

鄭玄曰西者隴西之
西今人謂之兌山

曰昧谷

徐廣曰一作柳谷駟案孔
安國曰日入于谷而天下

冥故曰昧谷此居治西
方之官掌秋天之政也

敬道日入便程西成

孔安國曰
秋西方萬

物成也

夜中星虛以正中秋

孔安國曰春言日秋言夜互
相備也虛玄武之中星亦言

七星皆以秋分日
見以正三秋也

其民夷鳥獸毛毳

孔安國曰夷平也
老壯者在田與夏

平也毳理也毛
更生曰整理

申命和叔居北方曰幽都

孔安國曰北
稱幽都謂所

聚便在伏物日短星昴以正中冬

孔安國曰日短冬至
之日也昴白虎之中

星亦以七星並見以正冬節也馬融王肅謂曰短晝漏四十刻鄭玄曰四十五刻其民燠鳥獸

翫毛

徐廣曰翫音茸駟案孔安國曰民入室處鳥獸皆生翫毳細毛以自溫也歲三百六十

六日以閏月正四時信飭

徐廣曰古勅字

百官衆功皆興堯曰

誰可順此事放齊曰嗣子丹朱開明

孔安國曰放齊臣名

堯曰吁

頑凶不用

孔安國曰吁疑怪之辭

堯又曰誰可者謹兜曰共工旁

聚布功可用

孔安國曰謹兜臣名鄭玄曰共工水官名

堯曰共工善言其用

僻似恭漫天不可堯又曰嗟四嶽

鄭玄曰四嶽四時官主方嶽之事

湯

湯洪水滔天浩浩懷山襄陵

孔安國曰懷包襄上也

下民其憂有

能使治者皆曰繇可

馬融曰繇臣名禹父

堯曰繇負命毀族不可

嶽曰異哉試不可用而已堯於是聽嶽用繇九歲功用

不成堯曰嗟四嶽朕在位七十載汝能庸命踐朕位

鄭玄

曰言汝諸侯之中有能順事用天命者入處我位統治天子之事者乎

嶽應曰鄙德忝帝

位堯曰悉舉貴戚及疏遠隱匿者衆皆言於堯曰有矜

在民間曰虞舜

孔安國曰無妻曰矜

堯曰然朕聞之其何如嶽曰

曰盲者子父頑母嚚弟傲能和以孝烝烝治不至姦

孔安

曰不至於姦惡

堯曰吾其試哉於是堯妻之二女觀其德於二

女舜飭下二女於媯汭

孔安國曰舜所居媯水之汭

如婦禮堯善之

乃使舜慎和五典

鄭玄曰五典五教也蓋試以司徒之職

五典能從乃徧

入百官百官時序賓於四門四門穆穆諸侯遠方賓客

皆敬

馬融曰四門四方之門諸侯羣臣朝者舜實迎之皆有美德也

堯使舜入山林

川澤暴風雷雨舜行不迷堯以為聖召舜曰女謀事至

而言可績三年矣

鄭玄曰三年者賓四門之後三年也

女登帝位舜讓於

德不懌

徐廣曰音亦今文尚書作不怡怡懌也

正月上日

馬融曰上日朔日也

舜受

終於文祖文祖者堯太祖也

鄭玄曰文祖者五府之大名猶周之明堂

於是

帝堯老命舜攝行天子之政以觀天命舜乃在璿璣玉

衡以齊七政

鄭玄曰璿璣玉衡渾天儀也七政日月五星也

遂類於上帝

鄭玄曰禮

祭上帝于園丘

禋于六宗

鄭玄曰六宗星辰司中司命風師雨師也駟案六宗義衆矣愚謂鄭說為

長望於山川辯於羣神

徐廣曰辯音班駟案鄭玄曰羣神若丘陵墳衍

揖五瑞

擇吉月日見四嶽諸牧班瑞

馬融曰揖敝也五瑞公侯伯子男所執以為瑞信也

堯將禪舜使羣牧敝之使舜親往班之

歲二月東巡狩至于岱宗柴

馬融曰舜

受終後五年之二月鄭玄曰建卯之月也柴祭東嶽者考績崇燎也

望秩於山川遂見東

方君長合時月正日

鄭玄曰協正四時之月數及日名備有失誤

同律度量

衡

鄭玄曰律音律度丈尺量斗斛衡斤兩也

脩五禮

馬融曰吉凶賓軍嘉也

五玉

鄭玄曰即

五瑞也執之曰

三帛

馬融曰三孤所執也鄭玄曰帛所以薦玉也必三者高陽氏後用赤

瑞陳列曰玉

繒高辛氏後用黑繒其餘諸侯皆用白繒

二生一死為摯

馬融曰摯二生羔雁卿大夫所執一

死雉士所執

如五器卒乃復

馬融曰五器上五玉五玉禮終則還之三帛以下不還

五

月南巡狩八月西巡狩十一月北巡狩皆如初歸至于

祖禰廟用特牛禮五歲一巡狩羣后四朝

鄭玄曰巡狩之年諸侯見

於方嶽之下其間四年四方諸侯分來朝于京師也

徧告以言明試以功車服以

庸肇十有二州決川

馬融曰禹平水土置九州舜以冀州之北廣大分置并州燕齊遼遠

分燕置幽州分齊為營州於是為十二
州也鄭玄曰更為之定界濟水害也
象以典刑馬融曰言

咎繇制五常之刑無犯之
者但有共象無其人也
流宥五刑馬融曰流放宥寬也一曰幼少二曰

老耄三曰蠢愚五
刑墨則刑官大辟
鞭作官刑馬融曰為辨治官事者為刑扑作教刑

鄭玄曰扑檣楚也金作贖刑馬融曰金黃金也意善功惡使出金贖罪坐示戒慎

者
眚裁過赦鄭玄曰眚裁為人作患害者也過失雖有害則赦之怙終徐廣曰一作衆賊

刑鄭玄曰怙其姦邪終身以為殘賊則用刑之欽哉欽哉惟刑之靜哉徐廣曰今

文云惟刑之謚哉
爾雅曰謚靜也
謹兜進言共工堯曰不可而試之工

師共工果淫辟四嶽舉鯀治鴻水堯以為不可嶽強請

試之試之而無功故百姓不便三苗

馬融曰國名也

在江淮荆

州數為亂於是舜歸而言於帝請流共工于幽陵

馬融曰北

裔以變北狄

徐廣曰變一作變

放讎兜于崇山

馬融曰南裔也

以變南

蠻遷三苗于三危

馬融曰西裔也

以變西戎殛鯀于羽山

馬融曰殛

誅也羽山東裔也

以變東夷四皐而天下咸服堯立七十年得

舜二十年而老令舜攝行天子之政薦之於天堯辟位

凡二十八年而崩

徐廣曰堯在位凡九十八年駟案皇覽曰堯冢在濟陰城陽劉向曰堯葬

濟陰丘隴山呂氏春秋曰堯葬穀林皇甫謐曰穀林即城陽堯都平陽於詩為唐國

百姓悲哀如

喪父母三年四方莫舉樂以思堯堯知子丹朱之不肖
不足授天下於是乃權授舜授舜則天下得其利而丹
朱病授丹朱則天下病而丹朱得其利堯曰終不以天
下之病而利一人而卒授舜以天下堯崩三年之喪畢

舜讓辟丹朱於南河之南

劉熙曰南河九河之最在南者

諸侯朝覲者

不之丹朱而之舜獄訟者不之丹朱而之舜謳歌者不
謳歌丹朱而謳歌舜舜曰天也夫而後之中國踐天子

位焉

劉熙曰天子之位不可曠年於是遂反格于文祖而當帝位帝王所都為中故曰中國

是為

帝舜虞舜者

謚法曰仁聖
盛明曰舜

名曰重華

徐廣曰皇甫謐曰
舜以堯之二十一

年甲子生三十一年甲午徵用七
十九年壬午即真百歲癸卯崩

重華父曰瞽叟瞽叟

父曰橋牛橋牛父曰句望句望父曰敬康敬康父曰窮

蟬窮蟬父曰帝顓頊顓頊父曰昌意以至舜七世矣自

從窮蟬以至帝舜皆微為庶人舜父瞽叟盲而舜母死

瞽叟更娶妻而生象象傲瞽叟愛後妻子常欲殺舜舜

避逃及有小過則受罪順事父及後母與弟日以篤謹

匪有解舜冀州之人也舜耕歷山

鄭玄曰
在河東

漁雷澤

鄭玄
曰雷

夏兗州澤
今屬濟陰

陶河濱

皇甫謐曰濟陰定陶西南陶丘亭是也

作什器於壽丘

皇甫謐曰在魯東門之北

就時於負夏

鄭玄曰負夏衛地

舜父瞽叟頑母嚚

弟象傲皆欲殺舜舜順適不失子道兄弟孝慈欲殺不可得即求常在側舜年二十以孝聞三十而帝堯問可用者四嶽咸薦虞舜曰可於是堯乃以二女妻舜以觀其內使九男與處以觀其外舜居媯汭內行彌謹堯二女不敢以貴驕事舜親戚甚有婦道堯九男皆益篤舜耕歷山歷山之人皆讓畔漁雷澤雷澤上人皆讓居陶河

濱河濱器皆不苦窳

史記音義曰音游甫反駟謂窳病也

一年而所居成

聚二年成邑三年成都堯乃賜舜絺衣與琴為築倉廩

予牛羊瞽叟尚復欲殺之使舜上塗廩瞽叟從下縱火

焚廩舜乃以兩笠自扞而下去得不死後瞽叟又使舜

穿井舜穿井為匿空旁出舜既入深瞽叟與象共下土

實井舜從匿空出去

劉熙曰舜以權謀自免亦大聖有神人之助也

瞽叟象喜

以舜為已死象曰本謀者象象與其父母分於是曰舜

妻堯二女與琴象取之牛羊倉廩予父母象乃止舜宮

居鼓其琴舜往見之象鄂不懌曰我思舜正鬱陶舜曰

然爾其庶矣舜復事瞽叟愛弟彌謹於是堯乃試舜五

典百官皆治昔高陽氏有才子八人

名見左傳

世得其利謂

之八愷

賈逵曰愷和也

高辛氏有才子八人

名見左傳

世謂之八元

賈逵曰元善也

此十六族者世濟其美不隕其名至於堯堯未

能舉舜舉八愷使主后土

王肅曰君治九土之宜杜預曰后土地也

以揆百

事莫不時序舉八元使布五教於四方父義母慈兄友

弟恭子孝內平外成昔帝鴻氏有不才子

賈逵曰帝鴻黃帝也不才

子其苗裔
謹兜也

掩義隱賊好行凶慝天下謂之渾沌少皞氏

服虔曰金
天氏帝號

有不才子毀信惡忠崇飾惡言天下謂之窮

奇

服虔曰謂共工氏
也其行窮而好奇

顓頊氏有不才子不可教訓不知

話言天下謂之檮杌

賈逵曰檮杌頑凶無
疇匹之貌謂鯀也

此三族世憂

之至于堯堯未能去緡雲氏

賈逵曰緡雲氏姜姓也炎
帝之苗裔當黃帝時在緡

雲之
官也

有不才子貪於飲食冒於貨賄天下謂之饕餮天

下惡之比之三凶

杜預曰非常子孫故
別之以比三凶也

舜賓于四門乃

流四凶族遷于四裔

賈逵曰四裔之地
去王城四千里

以御魑魅

服虔
曰魑

魁人面獸身四足好感人於是四門辟言毋凶人也舜山林異氣所生以為人害

入于大麓烈風雷雨不迷堯乃知舜之足授天下堯老使舜攝行天子政巡狩舜得舉用事二十年而堯使攝政攝政八年而堯崩三年喪畢讓丹朱天下歸舜而禹皋陶契后稷伯夷夔龍垂益彭祖自堯時而皆舉用未有分職於是舜乃至於文祖謀于四嶽辟四門明通四方耳目命十二牧論帝德行厚德遠佞人則蠻夷率服舜謂四嶽曰有能奮庸

馬融曰奮庸功也

美堯之事者使居官

相事皆曰伯禹為司空可美帝功舜曰嗟然禹汝平水

土維是勉哉禹拜稽首讓於稷契與皋陶舜曰然往矣

鄭玄曰然其舉得其人汝往居此官不聽其所讓也舜曰棄黎民始飢徐廣曰今文尚書作

祖飢祖始也汝后稷播時百穀鄭玄曰時讀曰蒔舜曰契百姓不親

五品不馴鄭玄曰五品父母兄弟子也王肅曰五品五常也汝為司徒而敬敷

五教在寬馬融曰五品之教舜曰皋陶蠻夷猾夏鄭玄曰猾夏侵亂中國也

寇賊姦軌鄭玄曰由內為起外為軌汝作士馬融曰獄官之長五刑有服

五服三就馬融曰五刑墨劓剕宮大辟三就謂大罪陳諸原野次罪於市朝同族適甸師氏既服五

刑當就
三處

五流有度五度三居維明能信

馬融曰謂在八議君不忍刑宥

之以遠五等之差亦有三等之居大罪投四裔次九州之外次中國之外當明其罪能使信服之

舜曰

誰能馴予工

馬融曰謂主百工之官也

皆曰垂可於是以垂為共工

馬融曰為司空共理百工之事

舜曰誰能馴予上下

馬融曰上謂原下謂隲

草木

鳥獸皆曰益可於是以益為朕虞

馬融曰虞掌山澤之官名

益拜稽

首讓于諸臣朱虎熊羆舜曰往矣汝諧遂以朱虎熊羆

為佐舜曰嗟四嶽有能典朕三禮

馬融曰三禮天神地祇人鬼之禮也鄭玄

曰天事地事人事之禮也皆曰伯夷可舜曰嗟伯夷以汝為秩宗

鄭玄

曰主次秩尊卑夙夜維敬直哉維靜潔伯夷讓夔龍舜曰然以

夔為典樂教穉子

鄭玄曰國子也案尚書作胄子孔安國曰穉胄聲相近

直而溫

馬融曰正直而色溫和

寬而栗

馬融曰寬大而敬謹戰栗也

剛而毋虐簡而毋

傲詩言意謂長言

馬融曰詩所以長言詩之意也

聲依詠律和聲

鄭玄曰聲

之曲折又依長言聲中律乃為和也

八音能諧毋相奪倫神人以和

鄭玄曰祖

考來格羣后德讓其一隅也

夔曰於予擊石拊石百獸率舞

鄭玄曰百獸服

不氏所養者也率舞言音和也

舜曰龍朕畏忌讒說殄偽振驚朕眾

徐廣

曰一云齊說殄行振驚眾駟案鄭玄曰所謂色取仁而行違是驚動我之眾臣使之疑惑

命汝為納

言夙夜出入朕命惟信舜曰嗟女二十有二人

馬融曰稷契皋

陶皆居官久有成功但述而美之無所復勅禹及垂已下皆初命凡六人與上十二牧四嶽凡二十二人鄭玄

曰皆格于文祖時所勅命也

敬哉惟時相天事三歲一考功三考絀

陟遠近衆功咸興分北三苗

鄭玄曰所竄三苗為西裔諸侯者猶為惡乃復分析

之此二十二人咸成厥功皋陶為大理平民各伏得其所

實伯夷主禮上下咸讓垂主工師百工致功益主虞山

澤辟棄主稷百穀時茂契主司徒百姓親和龍主賓客

遠人至十二牧行而九州莫敢辟違唯禹之功為大披

九山通九澤決九河定九州各以其職來貢不失厥宜
方五千里至于荒服南撫交趾北發西戎析枝渠廋氏
羌北山戎發息慎

鄭玄曰息慎或謂之肅慎東北夷

東長鳥夷四海之

內咸戴帝舜之功於是禹乃興九招之樂致異物鳳皇
來翔天下明德皆自虞帝始舜年二十以孝聞年三十

堯舉之年五十攝行天子事年五十八堯崩年六十一

代堯踐帝位

皇甫謐曰舜所都或言蒲坂或言平陽或言潘潘今上谷也

踐帝位三

十九年南巡狩崩於蒼梧之野葬於江南九疑是為零

陵

皇覽曰舜冢在零陵營浦縣其山九谿皆相似故曰九疑傳曰舜葬蒼梧象為之耕禮記曰舜葬蒼梧二

妃不從山海經曰蒼梧山帝舜葬于陽丹朱葬于陰皇甫謐曰或曰二妃葬衡山

舜之踐帝位

載天子旗往朝父瞽叟夔夔唯謹

徐廣曰和敬貌

如子道封弟

象為諸侯

孟子曰封之有庫音鼻

舜子商均亦不肖

皇甫謐曰娥皇無子女英

生商均

舜乃豫薦禹於天十七年而崩三年喪畢禹亦乃

讓舜子如舜讓堯子諸侯歸之然后禹踐天子位堯子

丹朱舜子商均皆有疆土

燕周曰以唐封堯之子以虞封舜之子

以奉先

祀服其服禮樂如之以客見天子天子弗臣示不敢專

也自黃帝至舜禹皆同姓而異其國號以章明德

徐廣曰外

傳曰黃帝二十五子其得姓者十四人虞翻云以德為氏姓又虞說以凡有二十五人其二人同姓姬又十一

人為十一姓酉祁已滕藏任荀釐姑
嫫衣是也餘十二姓德薄不紀錄

故黃帝為有熊帝

顓頊為高陽帝嚳為高辛帝堯為陶唐

韋昭曰陶唐皆國名猶湯稱殷

商矣張晏曰堯為唐侯國於中山唐縣是也

帝舜為有虞

皇甫謐曰舜嬪于虞因以為氏今河

東大陽西山
上虞城是也

帝禹為夏后而別氏姓姁氏契為商姓子

氏棄為周姓姬氏

鄭玄曰駁許慎五經異義曰春秋左傳無駭卒羽父請謚與族公問族於

眾仲眾仲對曰天子建德因生以賜姓胙之土而命之氏諸侯以字為氏因以為族官有世功則有官族邑亦

如之公命以字為展氏以此言之天子賜姓命氏諸侯命族族者氏之別名也姓者所以統繫百世使不別也氏者所以別子孫之所出故世本之篇言姓則在上言氏則在下也太史公曰學者多稱

五帝尚矣然尚書獨載堯以來而百家言黃帝其文不

雅馴薦紳先生難言之

徐廣曰薦紳即搢紳也古字假借

孔子所傳宰

子問五帝德及帝繫姓儒者或不傳余嘗西至空峒北

過涿鹿東漸於海南浮江淮矣至長老皆各往往稱黃

帝堯舜之處風教固殊焉總之不離古文者近是予觀

春秋國語其發明五帝德帝繫姓章矣顧弟弗深考

徐廣

曰弟但也史記漢書見此者非一又左思蜀都賦曰弟如滇池而不詳者多以為字誤學者安可不博觀乎

其所表見皆不虛書缺有間矣其軼乃時時見於他說非好學深思心知其意固難為淺見寡聞道也余并論次擇其言尤雅者故著為本紀書首

史記集解卷一

欽定四庫全書

史記集解卷二

宋 裴駟 撰

史記二

夏本紀第二

夏禹

諡法曰受禪
成功曰禹

名曰文命禹之父曰鯀鯀之父曰帝

顓頊顓頊之父曰昌意昌意之父曰黃帝禹者黃帝之
玄孫而帝顓頊之孫也禹之曾大父昌意及父鯀皆不

得在帝位為人臣當帝堯之時鴻水滔天浩浩懷山襄陵下民其憂堯求能治水者羣臣四嶽皆曰鯀可堯曰鯀為人負命毀族不可四嶽曰等之未有賢於鯀者願帝試之於是堯聽四嶽用鯀治水九年而水不息功用不成於是帝堯乃求人更得舜舜登用攝行天子之政巡狩行視鯀之治水無狀乃殛鯀於羽山以死天下皆以舜之誅為是於是舜舉鯀子禹而使續鯀之業堯崩帝舜問四嶽曰有能成美堯之事者使居官皆曰伯禹

為司空可成美堯之功舜曰嗟然命禹女平水土維是勉之禹拜稽首讓於契后稷皋陶舜曰女其往視爾事矣禹為人敏給克勤其德不違其仁可親其言可信聲

為律身為度

王肅曰以身為法度

稱以出

徐廣曰一作士

疊疊穆穆為綱

為紀禹乃遂與益后稷奉帝命命諸侯百姓興人徒以

傳土

尚書傳作敷馬融曰敷分也

行山表木定高山大川

馬融曰定其差秩祀

禮所視也駟案尚書大傳曰高山大川五嶽四瀆之屬

禹傷先人父鯀功之不成

受誅乃勞身焦思居外十三年過家門不敢入薄衣食

致孝于鬼神

馬融曰祭祀豐潔

卑宮室致費於溝洫

包氏曰方里為井井

間有溝溝廣深四尺十里為成成間有洫洫廣深八尺

陸行乘車水行乘船泥行

乘橇

徐廣曰他書或作範駟案孟康曰橇形如箕擿行泥上如淳曰橇音茅範之範謂以板置其泥上以

通行 山行乘橇

徐廣曰橇一作橈音丘遙反駟案如淳曰橇車謂以鐵如鉗頭長半寸施之履

下以上山不蹉跌也又音紀錄反

左準繩右規矩

王肅曰左右言常用也

載四時

王肅曰所以行不違四時之宜也

以開九州通九道陂九澤度九山今

益予衆庶稻可種卑溼命后稷予衆庶難得之食食少

調有餘相給以均諸侯禹乃行相地宜所有以貢及山

川之便利禹行自冀州始冀州既載

孔安國曰堯所都也先施貢賦役載

於書也鄭玄曰兩河間曰冀州

壺口治梁及岐

鄭玄曰地理志壺口山在河東北屈縣之東南

梁山在左馮翊夏陽岐山在右扶風美陽

既修太原至於嶽陽

孔安國曰太原今為郡名

太嶽在太原西南山南曰陽

覃懷致功

孔安國曰覃懷近河地名鄭玄曰懷縣屬河內

至於

衡漳

孔安國曰漳水橫流

其土白壤

孔安國曰土無塊曰壤

賦上上錯

孔安國曰

上上第一錯雜也雜出第二之賦

田中中

孔安國曰九州之中為第五

常衛既從大

陸既為

鄭玄曰地理志恒水出恒山衛水在靈壽大陸澤在鉅鹿

鳥夷皮服

鄭玄曰鳥夷東

北之民賦食鳥獸者孔安國曰服其皮明水除害

夾右碣石

孔安國曰碣石海畔之山也

入

于海

徐廣曰海一作河

濟河維沅州

鄭玄曰言沅州之界在此兩水之間

九河既

道

馬融曰九河名徒駭太史馬頰覆釜胡蘇簡絮鈎盤鬲津

雷夏既澤雍沮會同

鄭玄

曰雍水沮水相觸而合入此澤中地理志曰雷澤在濟陰城陽

桑土既蠶於是民得下

丘居土

孔安國曰大水去民下丘居平土就桑蠶

其土黑墳

孔安國曰色黑而墳起

草

繇木條

孔安國曰繇茂條長也

田中下

孔安國曰第六

賦貞作十有三年

乃同

鄭玄曰貞正也治此州正作不休十三年乃有賦與八州同言功難也其賦下下

其貢漆

絲其筐織文

孔安國曰地宜漆林又宜蠶織文錦綺之類盛之筐篚而貢焉

浮於濟漂

通於河

鄭玄曰地理志云漂水出東郡東武陽

海岱維青州

鄭玄曰東自海西至岱東

嶽曰嶠夷既略灘溜既道馬融曰嶠夷地名用功少曰嶠山嶠夷既略灘溜既道略鄭玄曰地理志灘水出琅

邪濁水出泰山萊蕪縣原山其土白墳海濱廣濶徐廣曰一作澤又作斥厥田

斥鹵鄭玄曰斥謂地鹹鹵田上下賦中上孔安國曰田第三賦第四厥貢鹽絺

海物維錯孔安國曰絺細葛錯雜非一種鄭玄曰海物海魚也魚種類尤雜岱畎絲枲

鉛松怪石孔安國曰畎谷也怪異好石似玉者岱山之谷出此五物皆貢之萊夷為牧

孔安國曰萊夷地名可以牧放其篚禽絲孔安國曰禽桑蠶絲中為琴瑟絃浮於汶通

於濟鄭玄曰地理志汶水出泰山萊蕪縣原山西南入濟海岱及淮惟徐州孔安國曰

東至海北至岱南及淮淮沂其治蒙羽其藝鄭玄曰地理志沂水出泰山蓋縣蒙羽二

史記集解

山名孔安國曰二水已治二山可以種藝

大野既都

鄭玄曰大野在山陽鉅野北名鉅野澤孔安國

曰水所停曰都

東原底平

鄭玄曰東原地名今東平郡即東原

其土赤埴墳

徐廣曰埴

也黏土

草木漸包

孔安國曰漸長進包叢生也

其田上中賦中中

孔安國曰

田第五

貢維土五色

鄭玄曰土五色者所以為太社之封

羽畎夏狄

孔安國曰

夏狄雉名也羽中旌旄羽山之谷有之

嶧陽孤桐

孔安國曰嶧山之陽特生桐中琴瑟鄭玄曰地

理志嶧山在下邳

泗濱浮磬

孔安國曰泗水涯水中見石可以為磬鄭玄曰泗水出濟陰乘氏也

淮夷蠙珠泉魚

孔安國曰淮夷二水名出蠙珠及美魚鄭玄曰淮夷淮水之上民也

其篚

玄纈縞

鄭玄曰纈細也祭服之材尚細

浮于淮泗通于河淮海維揚州

孔安國曰北地彭蠡既都陽鳥所居鄭玄曰地理志彭蠡澤在豫章彭澤西孔

安國曰隨陽之鳥鴻雁之屬冬月居北澤也三江既入震澤致定孔安國曰震澤吳南

太湖名言三江已入致定為震澤竹箭既布孔安國曰水去布生其草惟夭其木

惟喬少長曰天其土塗泥馬融曰漸洳也田下下賦下上上雜

孔安國曰田第九賦第七雜出第六貢金三品孔安國曰金銀銅鄭玄曰銅三色也瑤琨竹

箭孔安國曰瑤琨皆美玉也齒草羽毛孔安國曰象齒犀皮鳥羽旄牛尾也島夷卉服

孔安國曰南海島夷草服葛越其篚織貝孔安國曰織細繒也貝水物也鄭玄曰貝錦名也詩云成

是貝錦凡織者先染其絲織之即成矣其包橘柚錫貢孔安國曰小曰橘大曰柚錫命乃貢

言不常也鄭玄曰有錫則貢之均江海通淮泗鄭玄曰

或時乏則不貢錫所以柔金也沿沿順荆及衡陽維荊州山南及衡山之陽江漢朝宗

于海

孔安國曰二水經此州而入海有

九江甚中

孔安國曰

江于此州界分為九道甚得地勢之中鄭玄

曰地理志九江在尋陽南皆東合為大江

孔安國曰沱江別名潞水名鄭玄曰水出江為沱漢為潞雲夢土為治

孔安國曰雲夢之澤在江

南其中有一丘水去可為耕作畎畝之治

其土塗泥田下中賦上下

孔安國曰

田第八賦第三

貢羽旄齒草金三品栴栝柏

鄭玄曰四木名孔安國曰栴栝

也栴葉松身曰栝

礪砥砮丹

孔安國曰礪細於礪皆磨石也砮石中天鐵丹朱類也

維菌

露楷

徐廣曰一作箭足訓釋菌露乎駟案鄭玄曰菌露聆風也或以箭足

也

三國致貢其名

馬融曰言菌露楷三國所致貢其名善也

包匭菁茅

鄭玄曰匭

纏結也菁茅茅有毛刺者給宗廟縮酒重之故包裹又纏結也

其篚玄纁璣組

孔安國曰此州

染玄纁色善故貢之璣珠類生於水中組綬類也

九江入賜大龜

孔安國曰尺二寸曰大龜

出於九江水中龜不常用賜命而納之

浮於江沱淦於漢踰于雒至於南

河荆河惟豫州

孔安國西南至荆山北距河水

伊雒瀍澗既入於河

孔安

國曰伊出陸渾山洛出上洛山澗出瀍池山瀍出河南北山四水合流而入河

榮播既都

孔安

國曰榮澤名波水已成遏都

道荷澤被明都

孔安國曰荷澤在胡陵明都澤名在荷東北水

流決覆被之

其土壤下土墳壚

孔安國曰壚疏也馬融曰豫州地有三等下者墳壚也

田中上賦雜上中

孔安國曰田第四賦第二又雜出第一

貢漆絲紵其

篚纖絮

孔安國曰細綿也

錫貢磬錯

孔安國曰治玉石錯治磬錯也

浮於雒

達於河華陽黑水惟梁州

孔安國曰東據華山之南西距黑水

汶嶧既甄

鄭玄曰地理志岷山在蜀郡渝底道嶧冢山在漢陽西

沱涔既道

孔安國曰沱潛發源此州入荆

州蔡蒙旅平

孔安國曰蔡蒙二山名祭山曰旅平言治功畢也鄭玄曰地理志蔡蒙在漢嘉縣

和夷底績

馬融曰和夷地名也

其土青驪

孔安國曰色青黑也

田下上賦下

中三錯

孔安國曰田第七賦第八雜出第七第九三等

貢璆鐵銀鏤砮磬

孔安國曰

璆玉名鄭玄曰黃金之美者謂之鐻鏤剛鐵可以刻鏤也熊羆狐狸織皮孔安國曰貢四獸之

皮也織皮今蜀也西傾因桓是來馬融曰治西傾山因桓水是來言無餘道也鄭玄曰地理

志西傾山在隴西臨洮浮于潛踰于沔孔安國曰漢上水為沔鄭玄曰或謂漢為沔入

于渭亂于河孔安國曰正絕流曰亂黑水西河惟雍州孔安國曰西距黑水

東據河龍門之弱水既西孔安國曰導之西流至于合黎鄭玄曰衆水皆東北獨西

也涇屬渭汭孔安國曰屬連也水北曰汭言治涇水入於渭也鄭玄曰地理志涇水出安定涇陽

漆沮既從灋水所同孔安國曰漆沮之水已從入渭灋水所同同于渭也荆岐

已旅孔安國曰荆在岐東非荊州之荆也終南敦物至于鳥鼠孔安國曰三山名言

相望也鄭玄曰地理志終南敦物皆在右扶風武功也

原隰底績至于都野鄭玄曰地

理志都野在武威名曰休屠澤

三危既度三苗大序

孔安國曰西裔之山已可居三苗之

族大有次序禹之功也

其土黃壤田上上賦中下

孔安國曰四第

少貢璆琳琅玕

孔安國曰璆琳琅玕石名而似珠者

浮于積石至于

龍門西河

孔安國曰積石山在金城西南河所經也龍門山在河東之西界

會于渭汭

織皮昆侖析支渠搜西戎即序

孔安國曰織皮毛布此四國在荒服之外流沙

之內羌髳之屬皆就次序之美禹之功及戎狄也

道九山沂及岐

鄭玄曰地理志沂在右扶

也風至于荆山踰于河壺口雷首至于太嶽

孔安國曰三山在冀州太

嶽在上黨西也

砥柱析城至于王屋

孔安國曰此三山在冀州之南河之北

太行

常山至于碣石入于海

孔安國曰此二山連延東北接碣石而入于滄海

西傾

朱圉鳥鼠

鄭玄曰地理志曰朱圉在漢陽南孔安國曰鳥鼠山渭水所出在隴西之西

至于

太華熊耳外方桐柏至于負尾

鄭玄曰地理志太華山在宏農華陰南熊耳在

盧氏東外方在潁川嵩高山桐柏山在南陽平氏東南陪尾在江夏安陸東北若橫尾者

道蟠冢至

于荆山

鄭玄曰地理志荆山在南郡臨沮

內方至于大別

鄭玄曰地理志內方在竟

陵名立章山大別在廬江安豐縣

汶山之陽至于衡山過九江至于敷

淺原

徐廣曰淺一作減駟案國語曰敷淺原一名博陽山在豫章

道九川弱水至於

合黎

鄭玄曰地理志弱水出張掖孔安國曰合黎水名在流沙東

餘波入于流沙

孔安

國曰弱水餘波西溢入流沙鄭玄曰地理志流沙居延西北名居延澤地記曰弱水西流入合黎山腹餘波入

于流沙通于南海馬融王肅皆云合黎流沙是地名道黑水至于三危入于南海

鄭玄曰地理志益州滇池有黑水祠而不記此山水所在地記曰三危山在鳥鼠之西南孔安國曰黑水自北

而南經三危過道河積石至于龍門南至華陰

孔安國曰至華

陰山北而東行東至砥柱

孔安國曰砥柱山名河水分流包山而過山見水中若柱然也在西虢之

界又東至于盟津

孔安國曰在洛北

東過雒汭至于大邳

孔安國曰

洛汭洛入河處山再成曰邳

北過降水至于大陸

鄭玄曰地理志降水在信都南孔安

國曰大北播為九河同為逆河入于海鄭玄曰下尾合陸澤名

逆受蟠冢道潑東流為漢鄭玄曰地理志潑水出隴西氏道至武都為漢至江夏謂

之夏水又東為滄浪之水孔安國曰別流也在荊州過三澁入于大別

孔安國曰三澁水名鄭玄曰在江夏竟陵之界南入于江東匯澤為彭蠡孔安國曰匯回也水

東回為彭蠡大澤東為北江入于海孔安國曰自彭蠡江分為三道入震澤遂為北江而入海汶

山道江東別為沱又東至于醴孔安國曰馬融王肅皆以醴為水名鄭玄曰醴陵名也大

阜曰陵長沙有醴陵縣過九江至于東陵孔安國曰東陵地名東迤北會于

匯孔安國曰迤澁也東澁東為中江入于海孔安國曰有北有中

南可也道流水東為濟入于河決為滎鄭玄曰地理志沈水出河東東垣王

屋山東至河內武德入河決為滎孔安東出陶丘北孔安

國曰濟在溫西北滎澤在敖倉東南地理志陶丘丘再成者也鄭玄曰又東至于荷孔安國曰荷澤之水

又東北會于汶又北東入于海道淮自桐柏東會于泗

沂東入于海孔安國曰與沂泗二水合入海也道渭自鳥鼠同穴孔安國曰

鳥鼠共為雄雌同穴處此東會于澧又東北至于涇東

過漆沮入于河孔安國曰漆沮二水名道雒自熊耳孔安

國曰在宜東北會于澗瀍孔安國曰會於河南城南又東會于伊孔安

陽之西

國曰會于東北入于河孔安國曰合於是九州攸同四

輿既居

孔安國曰四方之邑已可居也

九山槩旅

孔安國曰九州名山已槩木通道而旅祭

也

九川滌原

孔安國曰九州之川已滌除無壅塞也

九澤既陂

孔安國曰九州之澤

皆已陂障無決溢也

四海會同六府甚修

孔安國曰六府金木水火土穀

衆土交

正致慎財賦

鄭玄曰衆土美惡及高下得其正矣亦致其貢篚慎奉其財物之稅皆法定制而入

之咸則三壤成賦

鄭玄曰三壤上中下各三等也

中國賜土姓祗台德

先不距朕行

鄭玄曰中即九州也天子建其國諸侯祗之土賜之姓命之氏其敬悅天子之德既

先又不距違我天子政教所行

令天子之國以外五百里甸服

孔安國曰為天

子之服治田去王城面五百里內

百里賦納總

孔安國曰甸內近王城者禾稌曰總供食國之

也

馬二百里納銍

孔安國曰銍刈謂禾穗

三百里納秸服

孔安國曰秸稌也服

投稌

四百里粟五百里米

孔安國曰精者少麤者多

甸服外五百里

侯服

孔安國曰侯侯也斥侯而服事也

百里采

馬融曰采事也各受王事者

二百里

任國

孔安國曰任王事者

三百里諸侯

孔安國曰三百里同為王者斥侯故合三為一名

侯服外五百里綏服

孔安國曰綏安也服王者政教

三百里揆文教

孔安

國曰揆度也度王者文教而行之三百里皆同

二百里奮武衛

孔安國曰文教之外二百里奮

武衛天子所以安之

綏服外五百里要服

孔安國曰要束以文教也

三百里夷

孔安國曰守平常之教事王者而已
二百里蔡
馬融曰蔡法也受王者刑法而已
要服外

五百里荒服
馬融曰政教荒忽因其故俗而治之
三百里蠻
馬融曰蠻慢也禮簡怠慢

來不距去不禁
二百里流
馬融曰流行無城郭常居
東漸于海西被于流沙

朔南暨
鄭玄曰朔北方也
聲教訖于四海於是帝錫禹玄圭以

告成功于天下天下於是太平治皋陶作士以理民帝

舜朝禹伯夷皋陶相與語帝前皋陶述其謀曰信其道

德謀明輔和禹曰然如何皋陶曰於慎其身修思長
孔安

國曰慎修其身思為長久之道
敦序九族衆明高翼近可遠在已
鄭玄曰次

序九族而親之以衆明作羽翼
之臣此政由近可以及遠也
禹拜美言曰然皋陶曰

於在知人在安民禹曰吁皆若是惟帝其難之
孔安國曰言帝

堯亦以知人則智能官人能安民則惠黎民懷之能知
為難

能惠何憂乎謹兜何遷乎有苗何畏乎巧言善色佞人

鄭玄曰禹為父
隱故言不及鯀
皋陶曰然於亦行有九德亦言其有德

乃言曰始事事
孔安國曰言其人有德必
寬而栗
孔安國曰

性寬宏而柔而立
孔安國曰和柔而能立事
愿而共
孔安國曰愬愿而恭敬
治

而敬擾而毅
徐廣曰擾一作柔駟案孔
直而溫簡而廉
安國曰擾順也致果為毅

剛而實彊而義章其有常吉哉

孔安國曰章明也吉善也

日宣三德

蚤夜翊明有家

孔安國曰三德九德之中有其三也日卿大夫稱家明行之可以為卿大夫

嚴振敬六德亮采有國

孔安國曰嚴敬也行六德以信治政事可為諸侯也馬融曰亮

信采事也

翕受普施九德咸事俊乂在官

孔安國曰翕合也能合受三六之德

而用之以布施政教使九德之人皆用事謂天子也如此則俊德理能之士並皆在官也

百吏肅謹

毋教邪淫奇謀非其人居其官是謂亂天事天討有辜

五刑五用哉

孔安國曰言用五刑必當

吾言底可行乎禹曰汝言致

可績行皋陶曰余未有知思贊道哉帝舜謂禹曰汝亦

昌言禹拜曰於予何言予思曰孳孳皋陶難禹曰何謂

孳孳禹曰鴻水滔天浩浩懷山襄陵下民皆服於水予

陸行乘車水行乘舟泥行乘橈山行乘櫟行山槩木與

益予衆庶稻鮮食

孔安國曰鳥獸新殺曰鮮

以決九川致四海浚畎

澮

鄭玄曰畎澮田間溝也

致之川與稷予衆庶難得之食食少調

有餘補不足徙居衆民乃定萬國為治皋陶曰然此而

美也禹曰於帝慎乃在位安爾止

鄭玄曰安汝之所止無妄動動則擾民

輔德天下大應清意以昭待上帝命天其重命用休

鄭玄

曰天將重命汝以美應謂符瑞也

帝曰吁臣哉臣哉臣作朕股肱耳目

予欲左右有民女輔之

馬融曰我欲左右助民汝當翼成我也

余欲觀古

人之象日月星辰作文繡服色女明之余欲聞六律五

聲八音來治滑以出入五言女聽

尚書滑字作習音忽鄭玄曰習者臣見君

所秉書思對命者也君亦有焉以出入政教於五官

予即辟女匡拂予女無面諛

退而謗予敬四輔臣

尚書大傳曰古者天子必有四隣前曰疑後曰丞左曰輔右曰弼

諸衆讒嬖臣君

徐廣曰一作吾

德誠施皆清矣禹曰然帝即不

時布同善惡則毋功

孔安國曰帝用臣不是則賢愚竝立優劣共流故也

帝曰毋若

丹朱教維慢游是好母水舟行朋淫于家

鄭玄曰朋用淫淫門內

絕其世子不能順是禹曰予辛壬娶塗山癸甲生啓

孔安

國曰塗山國名辛日娶妻至于甲四日復往治水予不子以故能成水土功輔

成五服至于五千里州十二師外薄四海咸建五長

孔安

國曰薄迫言至海也諸侯五國立賢者一人為方伯謂之五長以相統治各道有功苗頑不

即功

孔安國曰三苗頑凶不得就官善惡分別

帝其念哉帝曰道吾德乃女

功序之也皋陶於是敬禹之德令民皆則禹不如言刑

從之舜德大明於是夔行樂祖考至羣后相讓鳥獸翔

舞簫韶九成鳳皇來儀

孔安國曰簫韶舞樂名備樂九奏而致鳳皇也

百獸率

舞百官信諧帝用此作歌曰陟天之命維時維幾

孔安國曰

奉正天命以臨民惟在順時惟在慎微

乃歌曰股肱善哉元首起哉百工

喜哉

孔安國曰股肱之臣喜樂盡忠君之治功乃起百官之業乃廣

皋陶拜手稽首揚

言曰念哉

鄭玄曰使羣臣念帝之戒

率為興事慎乃憲敬哉

孔安國曰率臣

下為起治之事當慎汝法度敬其職

乃更為歌曰元首明哉股肱良哉庶

事康哉舜又歌曰元首叢脞哉股肱惰哉萬事墮哉

孔安

國曰叢脞細碎無大略也君如此則臣懈惰萬事墮廢也

帝拜曰然往欽哉於是天

下皆宗禹之明度數聲樂

徐廣曰舜本記云禹乃興九韶之樂

為山川神

主帝舜薦禹於天為嗣十七年

劉熙曰若此則舜格于文祖三年之後攝禹使

得祭祀興

而帝舜崩三年喪畢禹辭辟舜之子商均於陽城

劉熙曰今潁川陽城是也

天下諸侯皆去商均而朝禹禹於是遂即

天子位

皇甫謐曰都平陽或在安邑或在晉陽

南面朝天下國號曰夏后

姓姁氏

禮緯曰祖以吞薏苡生

帝禹立而舉皋陶薦之且授政焉

而皋陶卒封皋陶之後於英六

徐廣曰史記皆作英字而以英布是此苗裔

或在許

皇覽曰皋陶冢在廬江六縣

而后舉益任之政十年帝禹東

巡狩至于會稽而崩

皇甫謐曰年百歲也

以天下授益三年之喪

畢益讓帝禹之子啓而辟居箕山之陽

孟子曰陽字一作陰劉熙曰崇

高之北

禹子啓賢天下屬意焉及禹崩雖授益益之佐禹

日淺天下未洽故諸侯皆去益而朝啓曰吾君帝禹之

子也於是啓遂即天子之位是為夏后帝啓夏后帝啓

禹之子其母塗山氏之女也有扈氏不服

地理志曰扶風郿縣是扈

啓伐之大戰於甘

馬融曰甘有扈氏南郊地名

將戰作甘誓乃召

六卿申之

孔安國曰天子六卿其將皆命卿也

啓曰嗟六事之人

孔安國曰各有

軍事故曰六事予誓告女有扈氏威侮五行急棄三正鄭玄曰五行四

時盛德所行之政也威侮逆之三正天地人之正道暴天用勦絕其命孔安國曰勦絕也

今予維共行天之罰孔安國曰共奉也左不攻于左右不攻于

右女不共命鄭玄曰左右車右御非其馬之政女不共命孔安

國曰御以正馬為政也三者有失皆不奉我命也用命賞于祖孔安國曰天子親征必載遷廟

之祖主行有功即賞不用命僂於社孔安國曰又載社主謂之社事奔北

則僂之社主前社主陰陰主殺也予則帑僂女孔安國曰非但止身辱及女子言恥累之遂

滅有扈氏天下咸朝夏后帝啓崩徐廣曰皇甫謐曰夏啓元年甲辰十年癸

崩 丑 子帝太康立

帝太康失國

孔安國曰盤于游田不恤民事為羿所逐不得

反 昆弟五人須于洛汭作五子之歌

孔安國曰太康五弟與其母待太康

于洛水之北怨其不反故作歌

太康崩弟中康立是為帝中康

帝中

康時羲和湎淫廢時亂日

孔安國曰羲和氏掌天地四時之官太康之後沈湎於酒

廢天時亂甲乙也

胤往征之作胤征

孔安國曰胤國之君受王命往征之鄭玄曰胤臣名

中康崩子帝相立

帝相崩子帝少康立

帝少康崩

子帝宁立

帝宁崩子帝槐立

帝槐崩子帝芒立

帝芒崩子帝泄立

帝泄崩子帝不降立

帝不降崩

弟帝局立 帝局崩子帝廩立 帝廩崩立帝不降之

子孔甲是為帝孔甲 帝孔甲立好方鬼神淫亂夏后

氏德衰諸侯畔之天降龍二有雌雄孔甲不能食未得

豢龍氏

賈逵曰豢養也穀食曰豢

陶唐既衰其后有劉累

服虔曰后劉累之為

諸侯者夏后賜之姓

學擾龍

應劭曰擾音柔擾馴也能順養得其嗜慾

于豢龍氏以事

孔甲孔甲賜之姓曰御龍氏

服虔曰御亦養

受豕韋之後

徐廣曰受

一作更駟緊賈逵曰劉累之後至商不絕以代豕韋之後祝融之後封於豕韋殷武丁滅之以劉累之後代之

龍一雌死以食夏后夏后使求懼而遷去

賈逵曰夏后既饗而又使

求致龍劉累不能得而懼也傳曰遷于魯縣

孔甲崩子帝皋立

帝皋崩

左傳

曰皋墓在穀南陵

子帝發立

帝發崩子履癸立是為桀

帝

桀之時

謚法賊人多殺曰桀

自孔甲以來而諸侯多畔夏桀不務

德而武傷百姓百姓弗堪廼召湯而囚之夏臺已而釋

之湯修德諸侯皆歸湯湯遂率兵以伐夏桀桀走鳴條

孔安國地在安邑之西鄭玄曰南夷地名

遂放而死

徐廣曰從禹至桀十七君十四世

駟案汲冢紀

年曰有王與無王用歲四百七十一年矣

桀謂人曰吾悔不遂殺湯於夏臺

使至此湯乃踐天子位代夏朝天下湯封夏之後至周

封於杞也

太史公曰禹為姒姓其後分封用國為姓故有夏后氏

有扈氏有男氏斟尋氏

徐廣曰一云斟氏尋氏

彤城氏褒氏費氏

杞氏繒氏辛氏冥氏斟氏戈氏孔子正夏時學者多傳

夏小正云

禮運稱孔子曰我欲觀夏道是故之杞而不足徵也吾得夏時焉鄭玄曰得夏四時之書

其存者有小正

自虞夏時貢賦備矣或言禹會諸侯江南計功

而崩因葬焉命曰會稽會稽者會計也

皇覽曰禹冢在山陰縣會稽山

上會稽山本名苗山在縣南去縣七里越傳曰禹到大越上苗山大會計爵有德封有功因而更名苗山曰會

稽因病死葬葦棺穿壙深二尺上無瀉泄下無卽水壇高三尺上階三等周方一畝呂氏春秋曰禹葬會稽不煩人徒墨子曰禹葬會稽衣裘三領桐棺三寸地理志云山上有禹井禹祠相傳以為下有羣鳥耘田也

史記集解卷二

欽定四庫全書

史記集解卷三

宋 裴駟 撰

史記三

殷本紀第三

殷契母曰簡狄有娥氏之女

淮南子曰有娥在不周之北

為帝嚳次

妃三人行浴見玄鳥墮其卵簡狄取吞之因孕生契契長而佐禹治水有功帝舜乃命契曰百姓不親五品不

訓汝為司徒而敬敷五教五教在寬封於商

鄭玄曰商國在太華

之陽皇甫謐曰今上洛商是也

賜姓子氏

禮緯曰祖以玄鳥生子也

契興於唐虞大

禹之際功業著於百姓百姓以平契卒子昭明立 昭

明卒子相土立

宋忠曰相土就契於封商春秋左氏傳曰關伯居商丘相土因之

相土卒

子昌若立

昌若卒子曹圉立

曹圉卒子冥立

宋忠曰冥

為司空勤其官事死於水中殷人郊之

冥卒子振立

振卒子微立

微

卒子報丁立

報丁卒子報乙立

報乙卒子報丙立

報丙卒子主壬立

主壬卒子主癸立

主癸卒子天

乙立是為成湯成湯

張晏曰禹湯皆字也二王去唐虞之文從高陽之質故夏殷之王皆

以名為號謚法曰除虐去殘曰湯

自契至湯八遷

孔安國曰十四世凡八徙國都湯始

居亳

皇甫謐曰梁國穀熟為南亳即湯都也

從先王居

孔安國契父帝嚳都亳湯自商丘遷

馬故曰從先王居

作帝誥湯征諸侯

孔安國曰為夏方伯得專征伐

葛伯不祀

湯始伐之

孟子曰湯居亳與葛伯為鄰地理志曰葛今梁國寧陵之葛鄉

湯曰予有言

人視水見形視民知治不伊尹曰明哉言能聽道乃進

君國子民為善者皆在王官勉哉勉哉湯曰女不能敬

命予大罰殛之無有攸赦作湯征伊尹名阿衡阿衡欲

干湯而無由乃為有莘氏媵臣

列女傳曰湯妃有莘氏之女

負鼎俎

以滋味說湯致於王道或曰伊尹處士湯使人聘迎之

五反然後肯往從湯言素王及九主之事

劉向別錄曰九主者有法

君專君授君勞君等君寄君破君國君三歲社君凡九品圖盡其形

湯舉任以國政伊尹

去湯適夏既醜有夏復歸于亳入自北門遇女鳩女房

作女鳩女房

孔安國曰鳩房二人湯之賢臣也二篇皆所以醜夏而還之意也

湯出見

野張網四面祝曰自天下四方皆入吾網湯曰嘻盡之

矣乃去其三面祝曰欲左左欲右右不用命乃入吾網

諸侯聞之曰湯德至矣及禽獸當是時夏桀為虐政淫荒

而諸侯昆吾氏為亂湯乃興師率諸侯伊尹從湯湯自

把鉞以伐昆吾遂伐桀湯曰格汝眾庶來女悉聽朕言

匪台小子

馬融曰
台我也

敢行舉亂有夏多罪予維聞女眾言

夏氏有罪予畏上帝不敢不正

孔安國曰不敢不
正桀之罪而誅之

今夏

多罪天命殛之今女有眾女曰我君不恤我眾舍我嗇

事而割政

孔安國曰奪民農
功而為割剝之政

女其曰有罪其奈何夏王

率止眾力率奪夏國

孔安國曰桀之君臣相率割剝夏之邑
力使不得事農相率割剝夏之邑

君有衆率怠不和

馬融曰衆民相率怠愼不同

曰是日何時喪予與

女皆亡

尚書大傳曰桀云天之有日猶吾之有民日有亡哉日亡吾亦亡矣

夏德若茲今

朕必往爾尚及予一人致天之罰予其大理女

尚書理字作賚

鄭玄曰賚賜也

女毋不信朕不食言女不從誓言予則帑僇女

無有攸赦以告令師作湯誓於是湯曰吾甚武號曰武

王

詩云武王載旆有虔秉鉞毛傳曰武王湯也

桀敗於有娥之墟桀奔於鳴

條夏師敗績湯遂伐三嵎俘厥寶玉

孔安國曰三嵎國名桀走保之今定

陶也俘取也

義伯仲伯作典寶

孔安國曰二臣作典寶一篇言國之常寶也

湯既

勝夏欲遷其社不可

孔安國曰欲變置社稷而後作夏世無及句龍者故不可而止

社

孔安國曰言夏社不可遷之義

伊尹報

徐廣曰一云伊尹報政

於是諸侯心服

湯乃踐天子位平定海內湯歸至于泰卷陶

徐廣曰一无此陶字

孔安國曰地名湯自三襲而還

中囂作誥

孔安國曰仲虺湯左相奚仲之後

既紂夏命

孔安國曰紂其王命

還亳作湯誥維三月王自至於東郊告諸侯

羣后母不有功於民勤力廼事予乃大罰殛女母予怨

曰古禹皋陶久勞於外其有功乎民民乃有安東為江

北為濟西為河南為淮四瀆已修萬民乃有居后稷降

播農殖百穀三公咸有功于民故后有立

徐廣曰一作土

昔蚩

尤與其大夫作亂百姓帝乃弗予

音與

有狀先王言不可

不勉曰不道毋之

徐廣曰一作政

在國女毋我怨以令諸侯伊

尹作咸有一德

王肅曰言君臣皆有一德

咎單作明居

馬融曰咎單湯司空也明

居民之法也湯乃改正朔易服色上白朝會以晝湯崩

皇覽曰湯

冢在濟陰亳縣北東郭去縣三里冢四方方各十步高七尺上平處平地漢哀帝建平元年大司空御史長卿案行水災因行湯冢劉向曰殷湯無葬處皇甫謐曰即位十七年而踐天子位為天子十三年年百歲而崩

太子太丁未立而卒於是廼立太丁之弟外丙是為帝

外丙 帝外丙即位三年崩立外丙之弟中壬是為帝
中壬 帝中壬即位四年崩伊尹廼立太丁之子太甲
太甲成湯適長孫也是為帝太甲 帝太甲元年伊尹

作伊訓作肆命作徂后

鄭玄曰肆命者陳政教所當為也徂后者言湯之法度也帝

太甲既立三年不明暴虐不遵湯法亂德於是伊尹放

之於桐宮

孔安國曰湯葬地鄭玄曰地名也有王離宮焉

三年伊尹攝行政當

國以朝諸侯帝太甲居桐宮三年悔過自責反善於是
伊尹廼迎帝太甲而授之政帝太甲修德諸侯咸歸殷

百姓以寧伊尹嘉之廼作太甲訓三篇褒帝太甲稱太

宗太宗崩子沃丁立 帝沃丁之時伊尹卒既葬伊尹

於亳

皇覽曰伊尹冢在濟陰已氏平利鄉亳近已氏

咎單遂訓伊尹事作沃丁

沃丁崩弟太庚立是為帝太庚 帝太庚崩子帝小甲

立

徐廣曰世表云帝小甲太庚弟也

帝小甲崩弟雍已立是為帝雍已

殷道衰諸侯或不至帝雍已崩弟太戊立是為帝太戊

帝太戊立伊陟為相

孔安國曰伊陟伊尹之子

亳有祥桑穀共生于

朝一幕大拱

孔安國曰祥妖怪也二木合生不恭之罰鄭玄曰兩手盭之曰拱

帝太戊

懼問伊陟伊陟曰臣聞妖不勝德帝之政其有闕與帝

其修德太戊從之而祥桑枯死而去伊陟贊言于巫咸

孔安國曰贊告也巫咸臣名也

巫咸治王家有成作咸艾

馬融曰艾治也

作太

戊帝太戊贊伊陟于廟言弗臣伊陟讓作原命

馬融曰原臣名

也命原以禹湯之道我所修也

殷復興諸侯歸之故稱中宗中宗崩子

帝仲丁立帝仲丁遷于囂

孔安國曰地名皇甫謐曰或云河南穀倉是

河亶

甲居相

孔安國曰地名在河北

祖乙遷于邢帝仲丁崩弟外壬立

是為帝外壬中丁書闕不具帝外壬崩弟河亶甲立是

為帝河亶甲河亶甲時殷復衰河亶甲崩子帝祖乙立
帝祖乙立殷復興巫賢任職祖乙崩子帝祖辛立帝祖
辛崩弟沃甲立是為帝沃甲帝沃甲崩立沃甲兄祖辛
之子祖丁是為帝祖丁帝祖丁崩立弟沃甲之子南庚
是為帝南庚帝南庚崩立帝祖丁之子陽甲是為帝陽
甲帝陽甲之時殷衰自中丁以來廢適而更立諸弟子
弟子或爭相代立比九世亂次是諸侯莫朝帝陽甲崩
弟盤庚立是為帝盤庚帝盤庚之時殷已都河北盤庚

渡河南復居成湯之故居廼五遷無定處

孔安國曰自湯至盤庚凡

五遷

殷民咨胥相怨不欲徙

孔安國曰胥相也民不欲徙皆咨嗟憂愁相與怨其

也

盤庚乃告諭諸侯大臣曰昔高后成湯與爾之先祖

俱定天下法則可修舍而弗勉何以成德乃遂涉河南

治亳

鄭玄曰治於亳之殷地商家自此徙而改號曰殷亳皇甫謐曰今偃師是也

行湯之政

然後百姓由寧殷道復興諸侯來朝以其遵成湯之德也帝盤庚崩弟小辛立是為帝小辛帝小辛立殷復衰百姓思盤庚廼作盤庚三篇帝小辛崩弟小乙立是為

為帝小乙帝小乙崩子帝武丁立帝武丁即位思復興

殷而未得其佐三年不言政事決定於冢宰

鄭玄曰冢宰天官卿

貳王事者

以觀國風武丁夜夢得聖人名曰說以夢所見視

羣臣百吏皆非也於是廼使百工營求之野得說於傅

險中

徐廣曰戶子云傅巖在北海之州

是時說為胥靡築於傅險

孔安國曰

傅氏之岩在虞虢之界通道所經有澗水壞道常使胥靡刑人築葺此道說賢而隱代胥靡築之以供食也

見於武丁武丁曰是也得而與之語果聖人舉以為相

殷國大治故遂以傅險姓之號曰傳說帝武丁祭成湯

明日有飛雉登鼎耳而鳴武丁懼祖已曰

孔安國曰賢臣名

王

勿憂先修政事祖已乃訓王曰唯天監下典厥義

孔安國曰

言天視下民以義為常也降年有永有不永非天天民中絕其命民

有不若德不聽罪天既附命正厥德

孔安國曰不順德言無義也不服罪

不改修也天以信命正其德謂其有永有不永乃曰其奈何嗚呼王嗣敬民罔

非天繼常祀毋禮于弃道

孔安國曰王者主民當敬民事無非天時天時所常祀也

祭祀有常不當特豐於近也武丁修政行德天下咸驩殷道復興帝

武丁崩子帝祖庚立祖已嘉武丁之以祥雉為德立其

廟為高宗遂作高宗彤日及訓

孔安國曰祭之明日帝又祭殷曰彤周曰緹

祖庚崩弟祖甲立是為帝甲帝甲淫亂殷復哀帝甲崩

子帝廩辛立帝廩辛崩弟庚丁立是為帝庚丁帝庚丁

崩子帝武乙立殷復去亳徙河北帝武乙無道為偶人

謂之天神與之博令人為行天神不勝乃僇辱之為草

囊盛血仰而射之命曰射天武乙獵於河渭之濱暴雷

武乙震死子帝太丁立帝太丁崩子帝乙立帝乙立殷

益哀帝乙長子曰微子啟啟母賤不得嗣少子辛辛母

正后辛為嗣帝乙崩子辛立是為帝辛天下謂之紂謚

曰殘義損善曰紂

帝紂資辨捷疾聞見甚敏材力過人手格猛

獸知足以距諫言足以飾非矜人臣以能高天下以聲

以為皆出已之下好酒淫樂嬖於婦人愛妲己

皇甫謐曰有蘇

氏美女

妲己之言是從於是使師涓作新淫聲北里之舞

靡靡之樂厚賦稅以實鹿臺之錢

如淳曰新序曰鹿臺其大三里高千尺瓚

曰鹿臺名今朝歌城中

而盈鉅橋之粟

服虔曰鉅橋倉名許慎曰鉅鹿水之大橋也有漕粟

也益收狗馬奇物充仞宮室益廣沙丘苑臺

爾雅曰池邈沙丘也

地理志曰在鉅鹿東北七十里多取野獸蜚鳥置其中慢於鬼神大最

樂戲於沙丘

徐廣曰最一作聚

以酒為池縣肉為林使男女裸

相逐其間為長夜之飲百姓怨望而諸侯有畔者於是

紂乃重刑辟有炮烙之法

列女傳曰膏銅柱下加之炭今有罪者行焉輒墮炭中妲

已笑名曰炮烙之刑

以西伯昌九侯

徐廣曰一作鬼侯鄴縣有九侯城

鄂侯

徐廣曰一

作邾音干野王縣有邾城

為三公九侯有好女入之紂九侯女不憚

淫

徐廣曰一云無不憚淫

紂怒殺之而醢九侯鄂侯爭之彊辨之

疾并脯鄂侯西伯昌聞之竊嘆崇侯虎知之以告紂紂

因西伯美里

地理志曰河內湯陰有美里城西伯所拘處韋昭曰音酉

西伯之臣闕

夫之徒求美女奇物善馬獻紂紂乃赦西伯西伯出而獻洛西之地以請除炮烙之刑紂乃許之賜弓矢斧鉞使得征伐為西伯而用費中為政費中善諛好利殷人弗親紂又用惡來惡來善毀讒諸侯以此益疏西伯歸乃陰修德行善諸侯多畔紂而往歸西伯滋大紂由是稍失權重王子比干諫弗聽商容賢者百姓愛之紂廢之及西伯伐飢國滅之

徐廣曰飢一作阮又作者

紂之臣祖伊

孔安國曰

祖已後賢臣也

聞之而咎周

孔安國曰咎惡也

恐奔告紂曰天既訖我

殷命假人元龜

徐廣曰元一作卜

無敢知吉

馬融曰元龜大龜也長尺二寸孔安

國曰至人以人事觀殷大龜以神靈考之皆無知吉者

非先王不相我後人

孔安國曰相助

也

維王淫虐用自絕故天棄我不有安食不虞知天性

不迪率典

鄭玄曰王暴虐於民使不得安食逆亂陰陽不度天性微很明德不修教法者

今我

民罔不欲喪曰天曷不降威大命胡不至今王其奈何

紂曰我生不有命在天乎祖伊反曰紂不可諫矣西伯

既卒周武王之東伐至盟津諸侯叛殷會周者八百諸

侯皆曰紂可伐矣武王曰爾未知天命乃復歸紂愈淫
亂不止微子數諫不聽乃與太師少師謀遂去比干曰
為人臣者不得不以死爭迺強諫紂紂怒曰吾聞聖人
心有七竅剖比干觀其心箕子懼乃詳狂為奴紂又囚
之殷之太師少師乃持其祭樂器奔周周武王於是遂
率諸侯伐紂紂亦發兵距之牧野鄭玄曰牧野紂南郊地名也甲子
日紂兵敗紂走入登鹿臺徐廣曰鹿一作廩衣其寶玉衣赴火
而死周武王遂斬紂頭縣之白旗殺妲己釋箕子之囚

封比干之墓表商容之間封紂子武庚祿父以續殷祀

燕周曰殷凡三十一世六百餘年汲冢紀年曰湯滅夏以至於受二十九王用歲四百九十六年也令修

行盤庚之政殷民大說於是周武王為天子其後世貶
帝號號為王而封殷後為諸侯屬周周武王崩武庚與
管叔蔡叔作亂成王命周公誅之而立微子於宋以續
殷後焉

太史公曰余以頌次契之事自成湯以來采於詩書契
為子姓其後分封以國為姓有殷氏來氏宋氏空桐氏

雅氏北殷氏曰夷氏孔子曰殷路車為善而色尚白

史記集解卷三